



# **AYUNTAMIENTOS**

## **SOUTOMAIOR**

### **A N U N C I O**

Non habéndose producido reclamacións á aprobación inicial do “Regulamento da Agrupación de Voluntarios de Protección Civil de Soutomaior” e considerándose aprobado definitivamente, publícase o texto íntegro do mesmo en cumprimento do preceptuado no artº 70.2 da Lei 71/1985, de 2 de abril, Reguladora das Bases do Réxime Local, entrando en vigor unha vez transcurrido o prazo do artº 65.2 da citada Lei:

### **INTRODUCCIÓN**

En orde á realización de actividades diversas para a protección civil en situacións de emerxencia, os Concellos e os Alcaldes teñen competencias en

materia de Protección Civil, segundo o establecido nos artigos 25.2 c) e 21.1 y) da Lei 7/1985, de 2 de abril, Regulamentadora das Bases de Réxime Local.

O exercicio destas competencias ten que levarse a cabo fundamentalmente mediante actuacións dos concellos e dos alcaldes coa colaboración dun concelleiro delegado de protección civil, así como coa intervención coordinada dos Servicios Municipais dedicados de modo ordinario e permanente ó cumprimento de fins coincidentes coas necesidades derivadas das situacións de emerxencia nos casos de grave risco, catástrofe ou calamidade pública.

Así mesmo, nos números 3 e 4 do artigo 30 da Constitución Española determínase que poderá crearse un Servicio Civil para o cumprimento de fins de interese xeral e que mediante lei regularanse os deberes dos cidadáns nos casos de grave risco, catástrofe ou calamidade pública, polo que parece necesario que, sin prexuízo do establecido na lexislación regulamentadora do Servicio Civil e da Protección Civil sobre canto antecede, contéplense os recursos municipais mencionados coa incorporación dos cidadáns ós Servicios Municipais de Protección Civil, ofrecéndolles así oportunidades para asumir e realizar, voluntariamente, o cumprimento dos deberes que a Constitución lles atribue nas circunstancias aludidas anteriormente.

Por outra banda, a Lei 2/1985, de 21 de xaneiro, sobre Protección Civil e o Real Decreto 407/1992 que desenvolve a Norma Básica, en distintas partes do seu articulado recolle a participación, responsabilidade e competencias das diferentes Administracións públicas na Protección Civil, tendo un papel importante os concellos que por se-la administración máis cercana ós cidadáns convírtese na célula básica de protección civil.

Abundando na normativa, temos que recoller o Plan Territorial de Protección Civil da Comunidade Autónoma de Galicia (PLATERGA), recollido como Anexo no Decreto 56/2000, de 3 de marzo, da Dirección Xeral de Protección Civil, onde establécense, entre outras, as directrices para a planificación de ámbito local, así como os cometidos que poden desenvolver as agrupacións de voluntarios nos distintos estudos dos Plans de Emerxencia.

Para articula-las oportunidades de colaboración dos cidadáns, individualmente considerados, coa protección civil municipal, parece conveniente regular a organización e funcionamento dunha Agrupación de Voluntarios de Protección Civil deste concello que se vinculará ós servizos básicos de intervención en emerxencias dependentes do concello para realiza-las tarefas que procedan, sen prexuízo do que poida establecerse nas leis sobre prestación persoal e de servizos con carácter obrigatorio.

En virtude, previo acordo do concello, apróbase o regulamento da Agrupación de Voluntarios de Protección Civil deste municipio que se transcribe seguidamente.

## CAPÍTULO I FINALIDADE

### ARTIGO 1º

A protección civil municipal ten como fin a configuración dunha organización en base ós recursos municipais e á colaboración das entidades privadas e dos cidadáns, para garanti-la coordinación preventiva e operativa respecto da protección de persoas e bens ante os danos producidos polas situacións de emerxencia nos casos de grave risco, catástrofe ou calamidade pública, sen esquecer todo tipo de emerxencias menores, mediante a realización de actividades que permitan evita-las mesmas, reducir os seus efectos, repara-los danos e, no seu caso, contribuír a corrixir as causas productoras dos mesmos.

### ARTIGO 2º

A organización e funcionamento da Agrupación de Voluntarios de Protección Civil como modalidade de incorporación dos cidadáns ás actividades desta, rexirase polo establecido no presente regulamento, así como polas instrucións e directrices que, a efectos de coordinación xeral e participación no desenvolvemento ou execución dos plans, programas ou actividades no sistema autonómico de protección civil, sexan dictadas pola Dirección Xeral de Protección Civil e demais Administracións públicas de ámbito superior conforme establécese na Norma Básica de Protección Civil.

### ARTIGO 3º

Poderán vincularse á Agrupación de Voluntarios de Protección Civil as persoas físicas que con carácter altruísta comprométanse a colaborar directamente nas actividades propias dos servizos de protección civil dependentes do concello.

## CAPÍTULO II ORGANIZACIÓN

### ARTIGO 4º

Un dos cauces para a colaboración voluntaria dos veciños á protección civil municipal levarase a cabo mediante a incorporación dos mesmos á Agrupación de Voluntarios de Protección Civil a que se refire o presente regulamento, poidendo ser a través das figuras do voluntario operativo, voluntario de apoio ou colaborador.

**ARTIGO 5º**

Poderán incorporarse á Agrupación de Voluntarios de Protección Civil como voluntarios operativos tódolos veciños maiores de 18 anos que acrediten dispoñer de tempo libre e cumpran os requisitos de acceso que poden establecer as agrupacións sen que en ningún caso poida facerse discriminación por razóns de sexo, políticas, ideolóxicas, relixiosas ou calquera outra circunstancia persoal ou social.

Así mesmo, as persoas maiores de 16 anos e menores de 18, sempre que conste a autorización da persoa que exerce a patria potestade ou a tutela, poderán formar parte da agrupación como voluntarios de apoio.

**ARTIGO 6º**

Os veciños con formación e experiencia suficiente no exercicio profesional ou vocación relacionada con algunha das entidades deste servizo público, e polos motivos que fora non poidan ser voluntarios operativos, poderán estar unidos á agrupación mediante a figura de colaborador en misión de orientación, asesoramento, asistencia técnica ou axuda económica. A figura de colaborador pódese facer extensiva a aquelas entidades locais que desexen colaborar coa agrupación en calquera dos apartados mencionados anteriormente.

**ARTIGO 7º**

A vinculación dos voluntarios co concello non ten o carácter de relación laboral, administrativa, funcional ou mercantil, senón tan só de colaboración voluntaria para a prestación de servizos de maneira altruísta como medio de realización de accións humanitarias e de solidariedade social.

**ARTIGO 8º**

A incorporación á agrupación farase sempre en virtude de solicitude do interesado, na que declarará non estar inhabilitado para funcións públicas por sentenza firme e o compromiso de aceptar e coñecerlo contido deste regulamento, así como o disposto na normativa vixente sobre protección civil.

**ARTIGO 9º**

A condición de membro da Agrupación de Voluntarios de Protección Civil faculta unicamente para realiza-las actividades correspondentes á mesma, especialmente en situacións de emerxencia nos casos de grave risco, catástrofe ou calamidade pública e sempre en operativos organizados e coordinados pola Agrupación. Os voluntarios non poderán realizar, amparándose na pertencencia á agrupación, xa sexa en relación cos mandos dela ou en relación con outras persoas, actividades de carácter persoal.

**ARTIGO 10º**

As funcións do voluntariado, entre outras, son as de: promoción da prevención e autoprotección cidadán, así como a colaboración, auxilio e apoio dos servizos públicos de protección civil e, en todo caso, serán as indicadas no Plan de Emerxencia Municipal e outros plans de protección civil aprobados pola Comunidade Autónoma de Galicia.

**ARTIGO 11º**

A agrupación estruturarase, orgánica e funcionalmente, en seccións de acordo ás necesidades existentes no concello ou comarca e, en todo caso, disporá das seccións correspondentes en consonancia coa tipoloxía de riscos definidos no PEMU e, se é o caso, no PLATERGA.

**ARTIGO 12º**

Tódalas actuacións que realice a Agrupación de Voluntarios de Protección Civil en materia de protección civil no ámbito local, serán sempre autorizadas e coordinadas, ou se é o caso dirixidas, pola autoridade local correspondente.

**ARTIGO 13º**

O presidente será elixido democraticamente entre os membros da Agrupación. A duración máxima do mandato será de catro anos, podendo ser reelixido para novos mandatos.

Os xefes de sección e demais cargos da Xunta Directiva serán nomeados polo presidente da agrupación a proposta das súas respectivas seccións, sendo a duración do seu mandato de catro anos, podendo ser reelixidos.

A Xunta Directiva renovarase por metades, realizándose a primeira renovación, excepcionalmente, ós dous anos de mandato.

**ARTIGO 14º**

Tódolos compoñentes da agrupación ostentarán, sobre o lado esquerdo do peito, o distintivo de Protección Civil e no lado dereito a tarxeta de identidade de voluntario, de acordo o disposto no Decreto 56/2000, de 3 de marzo.

**ARTIGO 15º**

A AVPC contratará un seguro de accidentes, así coma de responsabilidade civil por danos a terceiros, que ampare os seus membros fronte ós riscos a que están sometidos no exercicio das súas funcións.

**ARTIGO 16º**

Polo Servizo Municipal de Protección Civil elaboraranse e formularanse propostas para aprobación das normas de carácter especial ou xeral que sexan necesarias para o desenvolvemento e aplica-

ción deste regulamento, así como para a regulación da actividade da Agrupación de Voluntarios de Protección Civil.

### CAPÍTULO III FORMACIÓN E PERFECCIONAMENTO

#### ARTIGO 17º

A formación terá como finalidade a preparación dos membros da Agrupación de Voluntarios de Protección Civil sobre os coñecementos relacionados coa caracterización deste servicio público, así como contribuír á selección dos aspirantes e facilitala capacitación destes para incorporarse en condicións de eficacia ás distintas seccións de intervención creadas.

#### ARTIGO 18º

A actividade formativa e de perfeccionamento do persoal voluntario conforme ó disposto no Decreto 56/2000, de 3 de marzo, articularase da seguinte maneira:

- 1) O nivel básico corresponde ós coñecementos mínimos que debe posuír un voluntario de protección civil para o correcto desenvolvemento das súas actividades.
- 2) O segundo nivel ou nivel operativo corresponde ós coñecementos que deben posuí-los compoñentes das distintas seccións ou grupos operativos das asociacións e agrupacións de voluntarios de protección civil.
- 3) O terceiro nivel ou nivel de especialidade ten como obxectivo a obtención da titulación oficial en determinadas actividades correspondentes ó segundo nivel. Os cursos axustaranse ós oficiais dos organismos que os impartan.
- 4) Ademais da formación regulada a Agrupación de Voluntarios de Protección Civil poderá propoñer outros cursos, xornadas, e cantas actividades de formación considere oportunas.

A actividade formativa complementarase coas seguintes accións:

- a) Exercicios prácticos con carácter periódico para a mellora permanente da preparación dos compoñentes da agrupación.
- b) A organización de bibliotecas e fondos de comunicación sobre protección civil e, especialmente, en relación coa organización e funcionamento de agrupacións de colaboradores voluntarios e outras modalidades da participación cidadán nas actividades de protección civil.
- c) O mantemento de relacións de colaboración mutua con outras Administracións públicas

ou entidades privadas relacionadas con protección civil.

- d) A colaboración e edición e, no seu caso, promoción de publicacións periódicas e unitarias sobre temas de protección civil e a divulgación de recomendacións á poboación sobre factores de risco potencial de emerxencia e comportamento ante os mesmos.

### CAPÍTULO IV DEREITOS E DEBERES

#### ARTIGO 19º

Son dereitos dos voluntarios de protección civil, no exercicio do seu labor de colaboración coa Administración autonómica:

- a) Recibi-la información, formación, orientación, apoio e, se é o caso, medios materiais necesarios para o exercicio das funcións que se lle asignen.
- b) Dispoñer dunha acreditación identificativa da súa condición de voluntario de protección civil.
- c) Emprega-la vestimenta homologada polo organismo competente en materia de protección civil da Xunta de Galicia.
- d) Realiza-la súa actividade nas debidas condicións de seguridade en función da natureza e características daquela.
- e) Participar na elección do presidente da Agrupación de Voluntarios de Protección Civil de entre os seus membros e demais cargos que estatutariamente se prevexan.

#### ARTIGO 20º

Son deberes dos voluntarios no exercicio do seu labor de colaboración:

- a) Gardar, cando proceda, confidencialidade da información recibida e coñecida durante o desenvolvemento da súa actividade como voluntario de protección civil.
- b) Rexeitar calquera tipo de contraprestación económica que puidese recibir dos cidadáns afectados directa ou indirectamente polas actividades desenvolvidas.
- c) Actuar de forma dilixente e solidaria, cumprindo coas indicacións e normas dictadas polos seus mandos naturais e as autoridades de protección civil.
- d) Participar nas tarefas formativas previstas pola autoridade competente de protección civil ou pola Agrupación de Voluntarios de Protección Civil, así como nas que con carácter permanente se precisen para mante-la calidade das prestacións.

- e) Empregar axeitadamente a vestimenta de protección civil cos seus distintivos, así como levar ben visible a súa acreditación.
- f) Coidar e utilizar de xeito adecuado os recursos e medios materiais que poña a súa disposición a Agrupación de Voluntarios de Protección Civil, ou, de se-lo caso, as autoridades de protección civil.
- g) Devolverlle a tarxeta de identidade e o uniforme ó responsable da Agrupación de Voluntarios de Protección Civil, así como o material asignado a súa custodia, no caso de causar baixa nela por calquera circunstancia.

#### CAPÍTULO V RECOMPENSAS E SANCIONES

##### ARTIGO 21º

As condutas dos compoñentes da Agrupación de Voluntarios de Protección Civil serán obxecto de valoración polos procedementos que se establezan nas correspondentes instrucións de desenvolvemento deste regulamento. Distinguiranse como proceda as condutas meritorias e sancionaranse, de conformidade co establecido neste regulamento, as infraccións ó previsto no mesmo.

As recompensas e sancións anotaranse no expediente persoal do interesado.

##### ARTIGO 22º

As accións meritorias que impliquen un nivel de dedicación superior ós deberes ordinarios do servizo (ou riscos para a vida e a integridade dos voluntarios), poderán ser recompensadas co recoñecemento público mediante o correspondente escrito da alcaldía ou a formulación pola mesma de proposta para a concesión das medallas ó mérito, as placas e diplomas de protección civil da Comunidade Autónoma de Galicia, ou outras distincións que poidan concedelas distintas Administracións públicas ou o concello, no seu caso, para premiar actos desta natureza especial.

##### ARTIGO 23º

As infraccións ó disposto neste regulamento sancionaranse previa tramitación do correspondente expediente; unha vez escoitado o interesado que poderá en todo momento face-las alegacións oportunas.

As faltas considéranse leves, graves e moi graves.

I. Estimaranse como faltas leves e serán sancionadas con apercibimento ou suspensión de ata un mes, atendendo ás circunstancias que concorran, as seguintes:

- a) O descuido na conservación e mantemento do equipo e material que tivera o seu cargo no cumprimento das misións encomendadas.

- b) A desobediencia ós mandos, cando isto supoña mal trato de palabra e obra e non afecte ó servizo que deba cumprirse.
- c) As demais infraccións ou omisións, con carácter leve, ó presente regulamento.

II. Consideraranse faltas graves e serán sancionadas coa suspensión dende un a seis meses, atendendo ás circunstancias que concorran, as seguintes:

- a) Negarse ó cumprimento das misións que lle sexan encomendadas sen causa.
- b) A utilización, fóra dos actos propios do servizo, do equipo, material e distintivos de protección civil.
- c) O deterioro por negligencia, perda do equipo, material, bens ou documentos do servizo o seu cargo e custodia.
- d) As omisións ou infraccións graves ó preceptuado neste regulamento e en particular o seu artigo 9º.
- e) A acumulación de tres faltas leves.

III. Serán causas de expulsión, como consecuencia de falta moi grave, as seguintes:

- a) Deixar de cumprir, sen causa xustificada, as esixencias do servizo.
- b) Observar mala conducta ou ser sancionado reiteradamente por faltas graves.
- c) Ser condeado por calquera acto delictivo a excepción das condenas derivadas de accidentes de circulación.
- d) Utilizar ou exhibir indebidamente o uniforme e/ou as identificacións do servizo.
- e) A agresión de palabra ou obra a calquera membro da agrupación e a desobediencia que afecte á misión que deba cumprir.
- f) Negarse a cumprir as sancións de suspensión que lle foran impostas.
- g) O incumprimento moi grave do establecido no presente regulamento e en especial o disposto no seu artigo 9º.

#### CAPÍTULO VI RESCISIÓN DO VÍNCULO COA AGRUPACIÓN

##### ARTIGO 24º

A relación de colaboración voluntaria coa agrupación terminárase a petición do interesado, por falecemento do mesmo, declaración de incapacidade, solicitude de baixa temporal ou definitiva, perda dalgunha das condicións esixidas para poder ser voluntario ou quedar incurso en situación de inhabilitación para o exercicio de cargos públicos por sentenza firme.

*ARTIGO 25º*

Considérase baixa temporal na Agrupación de Voluntarios de Protección Civil a suspensión da actividade na mesma como consecuencia de sanción ou a ausencia inferior a tres meses que teña motivos xustificadas que sexan comunicados oportunamente.

*ARTIGO 26º*

Será causa de baixa definitiva na agrupación a petición do interesado, a incomparecencia do mesmo por tempo superior a tres meses, sen causa xustificada, á actividade ordinaria ou especial que lle corresponda, e o incumprimento dos servicios mínimos esixidos, como consecuencia da comisión de falta considerada como moi grave de acordo co recollido no artigo 22º, III, deste regulamento.

*ARTIGO 27º*

Acordada a baixa seralle notificada ó interesado, garantizándolle o dereito de audiencia, e unha vez sexa asinada a baixa polo voluntario procederase á inmediata entrega da documentación de identidade, distintivo, uniforme, equipo e material que lle fora adxudicado pola agrupación.

*ARTIGO 28º*

En todo caso expedirase, a petición do interesado, un certificado no que consten os servicios prestados na Agrupación de Voluntarios de Protección Civil e a causa pola que se acordou a baixa.

*DISPOSICIÓN FINAIS*

1ª.—Pola alcaldía, ou concelleiro delegado de protección civil, dictaranse as instrucións e directrices que sexan necesarias para o desenvolvemento e aplicación deste regulamento.

2ª.—Este regulamento entrará en vigor unha vez aprobado definitivamente polo Concello, e publicado íntegramente o seu texto no "Boletín Oficial" da provincia, transcorrido o prazo pre-visto no art.70.2 da Lei 7/1985, de 2 de abril.

Soutomaior, a 28 de maio de 2002.—O Alcalde,  
Agustín Reguera Ocampo. 4330

\* \* \*